


大藏经

册二


王俊杰 韩传强 主编



CCP
印刷工业出版社

◆
册二
◆

大藏经



王俊杰 韩传强 ○ 主编



印刷工业出版社



图书在版编目(CIP)数据

大藏经 / 王俊杰, 韩传强主编. —北京: 印刷工业出版社, 2013.3

(藏书阁)

ISBN 978-7-5142-0775-0

I. ①大… II. ①王…②韩… III. ①大藏经 IV. ①B941

中国版本图书馆 CIP 数据核字 (2012) 第 289285 号



大藏经

出版发行: 印刷工业出版社

(北京市翠微路2号 邮编: 100036)

网 址: www.keyin.cn www.pprint.cn

制 作:  www.rzbook.com

印 刷: 北京缤索印刷有限公司

开 本: 七八七毫米×一〇九二毫米 十六开

印 张: 三十二

字 数: 四百五十千字

印 次: 二〇一三年三月第一版 二〇一三年三月第一次印刷

定 价: 一百九十八圆 (全四册)

百论·提婆菩萨造 婆薮开士释·姚秦三藏法师鸠摩罗什译

舍罪福品第一

顶礼佛足哀世尊，于无量劫荷众苦，烦恼已尽习亦除，梵释龙神咸恭敬。

亦礼无上照世法，能净瑕秽止戏论，诸佛世尊之所说，并及八辈应真僧。

外曰：偈言世尊之所说，何等是世尊？

内曰：汝何故生如是疑？

外曰：种种说世尊相故生疑。有人言韦纽天（秦言遍胜天）名世尊，又言摩酰首罗天（秦言大自在天）名世尊，又言迦毗罗、优楼迦、勒沙婆等仙人皆名世尊，汝何以独言佛为世尊？是故生疑。

内曰：佛知诸法实相，明了无碍，又能说深净法，是故独称佛为世尊。

外曰：诸余导师亦能明了诸法相，亦能说深净法。如迦毗罗弟子诵《僧伽经》，说诸善法总相别相，于二十五谛中，净觉分是名善法。优楼迦弟子诵《卫世师经》，言于六谛，求那谛中，日三洗、再供养火等和合生神分善法。勒沙婆弟子诵《尼干子经》，言五热炙身、拔发等受苦法是名善法。又有诸师，行自饿法、投渊、赴火、自坠高岩、寂默、常立、持牛戒等，是名善法。如是等皆是深净法，何以言独佛能说耶？

内曰：是皆邪见，覆正见故，不能说深净法，是事后当广说。

外曰：佛说何等善法相？

内曰：恶止善行法。（修妬路）

佛略说善法二种：止相、行相。息一切恶，是名止相；修一切善，是名行相。



唐·无款·四观音文殊普贤图

何等为恶？身邪行、口邪行、意邪行。身：杀、盗、淫；口：妄言、两舌、恶口、绮语；意：贪、瞋恼、邪见。复有十不善道所不摄，鞭杖系闭等。及十不善道前后种种罪，是名为恶。

何等为止？息恶不作，若心生、若口语、若受戒，从今日终不复作，是名为止。

何等为善？身正行、口正行、意正行。身：迎送、合掌、礼敬等；口：实语、和合语、柔软语、利益语；意：慈悲、正见等。如是种种清净法，是名善法。

何等为行？于是善法中，信受修习，是名为行。

外曰：汝经有过，初不吉故。（修妬路）

诸师作经法，初说吉故，义味易解，法音流布。若智人读诵念知，便得增寿，威德尊重。如有经名《婆罗呵波帝》（秦言广主经）如是经等，初皆言吉，以初吉故，中后亦吉。汝经初说恶，故是不吉，是以言汝经有过。

内曰：不然，断邪见故说是经。（修妬路）

是吉是不吉，此是邪见气，是故无过。

复次，无吉故。（修妬路）

若少有吉，经初应言吉，此实无吉。何以故？是一事此以为吉，彼以为不吉，或以为非吉非不吉，不定故无吉法。汝愚人无方便，强欲求乐，妄生忆想，言是事吉、是事不吉。

复次，自他共不可得故。（修妬路）

是吉法不自生，何以故？无有一法从自己生故。亦二相过故：一者生、二者能生。亦不从他生，自相无故，他相亦无。复次无穷故，以生更有生故。亦不共生，二俱过故。凡生法有三种：自、他、共。是三种中，求不可得，

是故无吉事。

外曰：是吉自生故如盐。（修妬路）

譬如盐自性咸，能使余物咸。吉亦如是，自性吉，能使余物吉。

内曰：前已破故亦盐相盐中住故。（修妬路）

我先破无有法自性生。复次，汝意谓盐因缘出，是故盐不自性咸，我不受汝语，今当还以汝语破汝所说：盐虽他物合，物不为盐，盐相盐中住故，譬如牛相不为马相。

外曰：如灯。（修妬路）

譬如灯既自照，亦能照他。吉亦如是，自吉，亦能令不吉者吉。

内曰：灯自他无暗故。（修妬路）

灯自无暗。何以故？明暗不并故。灯亦无能照，不能照故。亦二相过故，一能照、二受照。是故灯不自照。所照之处亦无暗，是故不能照他。以破暗故名照，无暗可破故非照。

外曰：初生时二俱照故。（修妬路）

我不言灯先生而后照，初生时自照亦能照他。

内曰：不然，一法有无相不可得故。（修妬路）

初生时名半生半未生，生不能照如前说，何况未生能有所照？复次，一法云何亦有相亦无相？

复次，不到暗故。（修妬路）

灯若已生、若未生，俱不到暗，性相违故。灯若不到暗，云何能破暗？

外曰：如咒星故。（修妬路）

若遥咒远人能令恼，亦如星变在天令人不吉。灯亦如是，虽不到暗，而能破暗。

内曰：太过实故。（修妬路）

若灯有力不到暗而能破暗者，何不天竺然灯破震旦暗？如咒星力能及远。而灯事不尔，是故汝喻非也。

复次，若初吉，余不吉。（修妬路）

若经初言吉，余应不吉。若余亦吉，汝言初吉者，是为妄语。

外曰：初吉故，余亦吉。（修妬路）

初吉力故，余亦吉。

内曰：不吉多故，吉为不吉。（修妬路）

汝经初言吉，则多不吉，以不吉多故，应吉为不吉。

外曰：如象手。（修妬路）

譬如象有手故名有手，不以有眼耳头等名为有眼耳头，如是以少吉力故，令多不吉为吉。

内曰：不然，无象过故。（修妬路）

若象与手异，头足等亦异，如是则无别象。若分中有分具者，何不头中有足？如破异品中说。若象与手不异者，亦无别象。若有分与分不异者，头应是足，二事与象不异故，如破一品中说。如是吉事，种种因缘求不可得，云何言初吉故中后亦吉？

外曰：『恶止』，『止』妙，何不在初？

内曰：行者要先知恶，然后能止，是故先『恶』后『止』。

外曰：『善行』应在初，有妙果故。（修妬路）

诸善法有妙果，行者欲得妙果，故止恶。如是应先说

『善行』，后说『恶止』。

内曰：次第法故，先除麤垢，次除细垢。（修妬路）

若行者不止恶，不能修善，是故先除粗垢，后染善法。

譬如浣衣，先去垢，然后可染。

外曰：已说恶止，不应复言善行。

内曰：布施等善行故。（修妬路）

布施是善行，非是恶止。复次，如大菩萨，恶已先止，行四无量心，怜愍众生，守护他命，是则善行，非止恶。

外曰：布施是止慳法，是故布施应是止恶。

内曰：不然，若不布施便是恶者，诸不布施悉应有罪。复次，诸漏尽人慳贪已尽，布施时止何恶？或有人虽行布施，慳心不止。纵复能止，然以善行为本，是故布施是善行。

外曰：已说『善行』，不应复说『恶止』。何以故？

『恶止』即是『善行』故。

明·吴彬·十六罗汉图



内曰：止相息，行相作。性相违故，是故说『善行』不摄『恶止』。

外曰：是事实尔，我不言『恶止』、『善行』是一相，但『恶止』则是善法，是故若言『善行』，不应复言『恶止』。

内曰：应说『恶止善行』，何以故？『恶止』名受戒时息诸恶，『善行』名修习善法。若但说善行福，不说恶止者，有人受戒恶止，若心不善、若心无记，是时不行善故，不应有福，是时恶止故亦有福，是故应说恶止，亦应说善行。是恶止善行法随众生意故佛三种分别，下、中、上人施戒智。（修妬路）

行者有三种：下智人教布施，中智人教持戒，上智人教智慧。布施名利益他，舍财相应思及起身口业。持戒名若口语、若心生、若受戒，从今日不复作三种身邪行、四种口邪行。智慧名诸法相中心定不动。何以说下、中、上？利益差降故。布施者少利益，是名下智，持戒者中利益，是名中智，智慧者上利益，是名上智。复次，施报下，戒报中，智报上，是故说下、中、上智。

外曰：布施者皆是下智不？

内曰：不然，何以故？施有二种：一者不净，二者净。行不净施者，是名下智人。

外曰：何等名不净施？

内曰：为报施是不净，如市易故。（修妬路）

报有二种：现报、后报。现报者，名称敬爱等；后报者，后世富贵等。是名不净施。所以者何？还欲得故。譬如贾客，远到他方，虽持杂物多所饶益，然非怜愍众生，以自求利故，是业不净，布施求报，亦复如是。

外曰：何等名净施？

内曰：若人爱敬利益他故，不求今世后世报，如众菩萨及诸上人，行清净施，是名净施。

外曰：持戒皆是中智人不？

内曰：不然，何以故？持戒有二种：一者不净，二者净。不净持戒者名中智人。

外曰：何等不净持戒？

内曰：持戒求乐报，为淫欲故，如覆相。（修妬路）

乐报有二种：一者为生天，二者人中富贵。若持戒求天上与天女娱乐，若人中受五欲乐，所以者何？为淫欲故。如『覆相』者，内欲他色，外诈亲善，是名不净持戒。如阿难语难陀：如羝羊相触，将前而更却，汝为欲持戒，其事亦如是。身虽能持戒，心为欲所牵，斯业不清净，何用是戒为？

外曰：何等名净持戒？

内曰：行者作是念：一切善法戒为根本，持戒之人则心不悔，不悔则欢喜，欢喜则心乐，心乐得一心，一心则生实智，实智生则得厌，得厌则离欲，离欲得解脱，解脱得涅槃。是名净持戒。

外曰：若上智者，郁陀罗伽、阿罗逻等为上。（修妬路）

若行智人是名上智，今郁陀罗伽、阿罗逻外道等应为上智人。

内曰：不然，何以故？智亦有二种：一者不净，二者净。

外曰：何等名不净智？

内曰：为世界系缚故不净，如怨来亲。（修妬路）

世界智能增长生死。所以者何？此智还系缚故。譬如怨家，初诈亲附，久则生害，世界智亦如是。

外曰：但是智能增长生死，施戒亦尔耶？

内曰：取福舍恶是行法。（修妬路）

福名福报。

外曰：若福名福报者，何以修妬路中但言福？

内曰：福名因，福报名果。或说因为果，或说果为因。此中说因为果，譬如『食千两金』，金不可食，因金得食，故名『食金』。又如见画言是『好手』，因手得画，故名『好手』。『取』名着，着福报。恶先已说。『行』名将人常行生死中。

外曰：何等是不行法？

内曰：俱舍。（修妬路）

『俱』名福报、罪报。『舍』名心不着，心不着福，不复往来五道，是名不行法。

外曰：福不应舍，以果报妙故，亦不说因缘故。（修妬路）

诸福果报妙，一切众生常求妙果，云何可舍？又如佛言：诸比丘于福莫畏。汝今又不说因缘，是故不应舍福。

内曰：福灭时苦。（修妬路）

福名福报，灭名失坏。福报灭时离所乐事，生大忧苦。如佛说：乐受生时乐、住时乐、灭时苦，是故应舍福。又如佛言于福莫畏者，助道应行故。如佛说：福尚应舍何况罪？

外曰：罪福相违故，汝言福灭时苦者，罪生住时应乐。

内曰：罪住时苦。（修妬路）



唐·无款·树下说法图

罪名罪报。罪报生时苦，何况住时？如佛说苦受生时苦、住时苦、灭时乐。汝言罪福相违故，罪生时应乐者，今当答汝：何不言福罪相违故，罪灭时乐，生住时苦？

外曰：常福无舍因缘，故不应舍。（修妬路）

汝说舍福因缘灭时苦。今当说福报中无灭苦，故不应舍。如经说能作马祀，是人度衰老死，福报常生处常，是福不应舍。

内曰：福应舍，二相过故。（修妬路）

是福有二相，能与乐能与苦；如杂毒饭，食时美，欲消时苦，福亦如是。复次，有福报是乐因，多受则苦因。譬如近火止寒则乐，转近烧身则苦。是故福二相，二相故无常，是以应舍。

又汝言马祀报常者，但有言说，无因缘故。（修妬路）

马祀福报实无常。何以故？祀业因缘有量故。世间因若有量，果亦有量，如泥团小，瓶亦小，是故马祀业有量，故无常。复次，闻汝天有瞋恚，共斗相恼，故不应常。又汝马祀等业从因缘生，故皆无常。

复次：有漏净福无常故尚应舍，何况杂罪福？（修妬路）

如马祀业中有杀等罪故。复次，如《僧伽经》言：祀法不净、无常，胜负相故，是以应舍。

外曰：若舍福不应作。（修妬路）

若福必舍本不应作，何有智人空为苦事？譬如陶家作器还破。

内曰：生道次第法，如垢衣浣染。（修妬路）

如垢衣先浣后净乃染，浣净不虚也。所以者何？染法次第故，以垢衣不受染故。如是先除罪垢，次以福德熏

心，然后受涅槃染。

外曰：舍福依何等？（修妬路）

依福舍恶，依何舍福？

内曰：无相最上。（修妬路）

取福，人、天中生，取罪，三恶道生。是故无相智慧最第一。无相名一切相不忆念，离一切受，过去、未来、现在法心无所著，一切法自性无故则无所依，是名无相。以是方便故能舍福，何以故？除三种解脱门，第一利不可得。如佛语诸比丘，若有人言我不用空、无相、无作，欲得若知若见无增上慢者，是人空言无实。

十二门论·龙树菩萨造·姚秦三藏法师鸠摩罗什译

观因缘门第一

说曰：今当略解摩诃衍义。

问曰：解摩诃衍有何义利？

答曰：摩诃衍者，是十方三世诸佛甚深法藏，为大功德利根者说，末世众生薄福钝根，虽寻经文不能通了。我愍此等，欲令开悟。又光阐如来无上大法，是故略解摩诃衍义。

问曰：摩诃衍无量无边，不可称数，直是佛语，尚不可尽。况复解释演散其义？

答曰：以是故，我初言略解。

问曰：何故名为摩诃衍？

答曰：摩诃衍者，于二乘为上，故名大乘，诸佛最大，是乘能至，故名为大，诸佛大人，乘是乘故，故名为

大；又能灭除众生大苦，与大利益事，故名为大；又观世音、得大势、文殊师利、弥勒菩萨等，是诸大士之所乘故，故名为大；又以此乘能尽一切诸法边底，故名为大；如《般若经》中佛自说摩诃衍义无量无边，以是因缘，故名为大。大分深义，所谓空也。若通达是义，即通达大乘。具足六波罗蜜，无所障碍。是故我今但解释空，解释空者，当以十二门入于空义。初是因缘门，所谓：

众缘所生法，是即无自性，若无自性者，云何有是法？

众缘所生法有二种：一者内，二者外。众缘亦有二种：

一者内，二者外。

外因缘者，如泥团、转绳、陶师等和合故有瓶生。又如缕紖、机杼、织师等和合故有氎生。又如治地、筑基、梁、椽、泥、草、人功等和合故有舍生。又如酪、器、钻摇人功等和合故有酥生。又如种子、地、水、火、风、虚空、时节、人功等和合故有芽生。当知外缘等法皆亦如是。

内因缘者，谓诸无明、行、识、名色、六入、触、受、爱、取、有、生、老死，各各先因而后生。

唐·金刚般若波罗蜜经

者即非佛法

須菩提於意云何須陀洹能作是念我得須陀洹果不須菩提言不也世尊何以故須陀洹名為入流而无所入不入色聲香味觸法故名須陀洹須菩提於意云何斯陀含能作是念我得斯陀含果不須菩提言不也世尊何以故斯陀含名一往來而實无往來是名斯陀含須菩提於意云何阿那含能作是念我得阿那含果不須菩提言不也世尊何以故阿那含名為不來而實无來是故名阿那含須菩提於意云何阿羅漢漢能作是念我得阿羅漢道不須菩提言不也世尊何以故阿羅漢漢道不須菩提言不也世尊何以故阿羅漢漢道即為著我人眾生壽者世尊佛說我得无諍三昧人中最為第一是離欲阿羅漢我不作是念我是離欲阿羅漢世尊我若作是念我得阿羅漢道世尊則不說須菩提是樂阿蘭那行者以須菩提實无所行而名須菩提是樂阿蘭那行者佛告須菩提於意云何如來昔在然燈佛所於法有所得不世尊如來在然燈佛所於法實无所得須菩提於意云何菩薩莊嚴佛土不也世尊何以故莊嚴佛土者則非莊嚴是名莊嚴是故須菩提諸菩薩摩訶薩應如是生清淨心不應住色生心不應住聲香味觸法生心

宋·无款·佛说法图



如是内外诸法，皆从众缘生，非是无性耶？若法自性无、他性亦无、自他亦无。何以故？因他性故无自性。若谓以他性故有者，则牛以马性有，马以牛性有，梨以柰性有，柰以梨性有，余皆应尔，而实不然。若谓不以他性故有，但因他故有者，是亦不然。何以故？若以蒲故有席者，则蒲席一体不名为他；若谓蒲于席为他者，不得言以蒲故有席。又蒲亦无自性。何以故？蒲亦从众缘出故无自性，无自性故，不得言以蒲性故有席。是故席不应以蒲为体，余瓶、酥等外因缘故生法，皆亦如是不可得。

内因缘故生法，皆亦如是不可得。如《七十论》中说：

缘法实无生，若谓为有生，为在一心中，为在多心中？

是十二因缘法实自无生。若谓有生，为一心中有？

为众心中有？若一心中有者，因果即一时共生。又因果一时有，是事不然。何以故？凡物先因后因果。若众心中有者，十二因缘法则各各别异，先分共心灭已，后分谁为因缘？灭法无所有，何得为因？十二因缘法若先有者，应若一心、若多心，二俱不然。是故众缘皆空，缘空故，从缘生法亦空。是故当知一切有为法皆空。有为法尚空，何况我耶？因五阴、十二入、十八界有为法故，说有我，如因可然故有然；若阴、入、界空，更无有法可说为我，如无可然不可说然。如经说：佛告诸比丘：因我故有所，若无我则无所。如是有为法空故，当知无为涅槃法亦空。何以故？此五阴灭更不生余五阴，是名涅槃。五阴本来自空，何所灭故